

JAMHURI YA MUUNGANO WA TANZANIA
WIZARA YA AFYA



Toleo la Machi 2024

**MIAKA MITATU YA RAIS MHE DKT. SAMIA
NA MAGEUZI MAKUBWA KATIKA SEKTA
YA AFYA NCHINI TANZANIA**



Jarida Maalum la Miaka Mitatu ya Rais Samia Suluhu Hassan na Mafanikio Makubwa katika Sekta ya Afya Nchini.

Yaliyomo

- 01** UJENZI WA MIUNDOBINU YA KUTOLEA HUDUMA ZA AFYA NCHINI



- 03** VITANDA VYA KULAZA WAGONJWA VYAONGEZEKA



- 05** KUIMARISHA KUIMARISHA UPATIKANAJI WA HUDUMA ZA UBINGWA NA UBINGWA BOBEZI NCHINIA HUDUMA ZA AFYA YA UZAZI, MAMA NA MTOTO



- 02** KUIMARISHA HUDUMA ZA UCHUNGUZI WA MAGONJWA



- 04** KUIMARISHA UPATIKANAJI WA DAWA NA BIDHAA ZA AFYA



- 06** KUIMARISHA HUDUMA ZA DHARURA NA AJALI



- 07** RASILIMALI WATU KATIKA SEKTA YA AFYA

- 08** MAPAMBANO DHIDI YA VIRUSI VYA UKIMWI, MALARIA NA KIFUA KIKUU

- 09** SHERIA YA BIMA YA AFYA KWA WOTE YAPITISHWA BUNGENI

- 10** MWELEKEO WA SEKTA YA AFYA KWA MWAKA 2024



Utangulizi

Serikali ya Awamu ya sita (6) inayoongozwa na Mhe. Dkt. Samia Suluhu Hassan, Rais wa Jamhuri ya Muungano wa Tanzania, imeendelea kutoa habari kwa wananchi kuhusu utekelezaji wa majukumu ya Serikali katika Sekta mbalimbali ikiwemo Sekta ya Afya.

Wizara ya Afya ndiyo yenye dhamana ya kuboresha hali ya afya ya wananchi wote ili kuwa na Jamii yenye afya bora na Ustawi, ambayo itachangia kikamilifu katika maendeleo ya mtu binafsi na Maendeleo ya nchi kwa ujumla. Katika kufikia azma hiyo, Wizara imeendelea kuandaa mipango na bajeti zake kwa kuzingatia Dira ya Taifa ya Maendeleo (2025), Sera ya Afya ya mwaka 2007, Ilani ya Uchaguzi ya Chama cha Mapinduzi (CCM) ya mwaka 2020-2025, Mpango Mkakati wa Tano wa Sekta ya Afya (2021/22 -2025/26) pamoja na

makubaliano ya Kimataifa na Kikanda yenye lengo la kuimarisha utoaji wa huduma bora za afya kwa wananchi.

Hadi kufikia Machi 2024, Wizara ya Afya ime-tekeleza kwa mafanikio majukumu yake, ikijikita katika maeneo Makuu mbalimbali yakiwemo; Ujenzi wa Miundombinu ya Kutolea Huduma za Afya nchini, Hali ya upatikanaji wa bidhaa za afya, Upatikanaji wa Huduma za Ubingwa Bobezi nchini, Huduma za Uchunguzi wa Mionzi, Huduma za Afya ya Uzazi na Mtoto, Magonjwa ya mlipuko, Ajira kwa Watumishi na Udahili wa Wanafunzi, Upatikanaji wa Watoa huduma ngazi ya Jamii (CHWs) na Sheria ya Bima ya Afya kwa wote. Aidha, taarifa hii inaelezea matarajio ya Wizara kuelekea Mwaka wa fedha 2024/25.

HOSPITALI YA RUFEEA KANDA YA KUSINI MTWARA



Rais Dkt. Samia Suluhu Hassan akikata utepe kuashiria uzinduzi rasmi wa Hospitali ya Rufaa ya Kanda ya Kusini Mtwara, Septemba 15, 2023.


Ujenzi wa Miundombinu ya Kutolea Huduma za Afya Nchini

1.1 Ongezeko la vituo vya kutolea huduma za afya

Katika kipindi cha Serikali ya Awamu ya Sita (6) umefanyika uwekezaji mkubwa katika miundombinu ya kutolea huduma za afya ambapo vituo vya kutolea huduma za afya vimeongezeka kutoka vituo 8,549 mwaka 2021 kufikia vituo 9,610 Machi 2024.

Hii ni sawa na ongezeko la vituo 1,061.

MGAWANYO WA VITUO VYA KUTOA HUDUMA ZA AFYA HADI KUFIKIA MACHI 2024 NI KAMA IFUATAVYO:



Jengo la Hospitali ya Rufaa ya Kanda ya Kusini Mtwara



Hospitali ya Rufaa kanda ya Kusini Mtwara.

1.2 Ujenzi na Ukarabati wa Miundombinu ya Kutolea Huduma za Afya

Serikali ya Awamu ya Sita (6) imeendelea na maboresho ya miundombinu ya kutolea huduma za afya ikiwa ni pamoja na ujenzi wa maengo mapya, ukarabati na kukamilisha ujenzi wa hospitali mpya katika mikoa mipya mitano.

Maboresho hayo yamegharimu jumla ya Shilingi Trilioni 1.02 na yalifanyika katika maeneo yafuatayo;

- i. Ukarabati wa majengo ya zamani na kuen-delea na ujenzi wa jengo jipya la wagonjwa binafsi katika Hospitali ya Taifa Muhimbili
- ii. Kukamilisha awamu mbalimbali za ujenzi wa hospitali ya Kanda ya Kusini Mtwara na hospitali ya Kanda Chato. Vilevile upanuzi wa miundombinu kwa kujenga majengo mapya katika Hospitali ya Rufaa ya Kanda ya Kaskazini - KCMC (Banka za Kusimika mitambo ya kutibu Saratani), Hospitali ya Kanda Mbeya na Hospitali ya Benjamin Mkapa-Dodoma (Jengo la kutolea huduma za Saratani) na Hospitali ya Kanda ya Bugando (Wodi ya wagonjwa wa Saratani) umefanyika.
- iii. Kukarabati majengo katika Hospitali maalumu ikiwemo Hospitali ya Taifa ya Afya ya Akili Mirembe, Hospitali ya Magonjwa Ambukizi Kibong'oto.
- iv. Kukamilisha ujenzi wa Hospitali mpya za Rufaa za Mikoa katika Mikoa ya Katavi, Njombe, Songwe, Simiyu na Geita pamoja na kuhamisha Hospitali tano (5) kutoka majengo yake ya zamani kwa kujenga Hospitali mpya katika maeneo mapya, Hospitali hizo ni Hospitali ya Rufaa ya Mkoa wa Ruvuma, Shinyanga, Singida, Mara na Lindi.



Majengo katika Hospitali ya Rufaa ya Mkoa wa Songwe



Majengo ya Hospitali ya Rufaa ya Mkoa Katavi.

- v. Kukarabati na kujenga majengo mapya ya kutolea huduma za afya ndani ya Hospitali katika Hospitali za Rufaa za Mikoa ya Ligula (Mtwara), Sekoutoure (Mwanza), Maweni (Kigoma), Sumbawanga (Rukwa), Kitete (Tabora) na Ukerewe (Mwanza).
- vi. Kujenga na kukarabati miundombinu ya kutolea huduma za Afya ngazi ya msingi ambapo Hospitali mpya za Halmashauri 127 zimejengwa (Hospitali 95 zimeanza kutoa huduma kwa wagonjwa wa nje na Hospitali 32 zipo katika hatua mbalimbali za ujenzi), ukarabati wa Hospitali Kongwe 50 za Halmashauri umefanyika, ujenzi wa Vituo vya Afya 367, ikijumuisha Vituo vya Tozo 234, ukamilishaji wa maboma ya Zahanati 980, ujenzi wa kituo cha kutibu magonjwa ya milipuko, ujenzi wa mitambo 21 ya kuzalisha hewa tiba ya oksijeni kwa ajili ya wagonjwa mahututi na Wagonjwa wa dharura na ujenzi wa nyumba za Watumishi 270.

Ongezeko la vituo vya kutoa huduma za afya nchini na maboresho ya miundombinu yaliyofanyika yametuwezesha kusogeza huduma za afya karibu zaidi na wananchi kama tunavyoelekezwa na Ilani ya Uchaguzi ya CCM ya mwaka 2020 - 2025. Hivi sasa asilimia 80 ya wananchi wanapata huduma za afya ndani ya kilometa 5 ya maeneo yao wanayoishi. Lengo ni kufikia asilimia 95 ifikapo mwaka 2030.

Asilimia

80

Kiwango cha sasa cha upatikanaji wa Huduma za Afya kwa wananchi ndani ya kilometa 5 ya maeneo wanayoishi.



Rais Dkt. Samia Suluhu Hassan akiwa na Waziri wa Afya Mhe. Ummu Mwalimu pamoja na Naibu Waziri Dkt. Godwin Mollel sambamba na viongozi wengine wakipata maelezo ya mashine ya CT Scan kutoka kwa mtaalam katika Hospitali ya Rufaa ya Kanda ya Kusini -Mtwara.

Kuimarisha Huduma za Uchunguzi wa magonjwa

Katika kuimarisha huduma za uchunguzi wa mionzi kwa wagonjwa, Serikali imenunua vifaa Tiba vya Uchunguzi na matibabu ya wagonjwa vyenye thamani ya shilingi bilioni 290.9 ambavyo vinapatikana kuanzia ngazi ya Hospitali ya Taifa hadi Hospitali za Rufaa za Mikoa (RRHs) na Halmashauri.

Mchanganuo wa vifaa vilivyoununuliwa ni kama ifuatavyo;

Aina ya Mashine	Zilizokuwepo kabla ya awamu ya sita	Mpya	Jumla
MRI	7	6	13
CT SCAN	13	32	45
MINI ANGIO SUIT	4	1	5
FLUOROSCOPY	9	1	10
DIGITAL X-RAY	147	199	346
ULTRASOUND	476	192	668
ECHOCARDIOGRAM	95	7	102
PET SCAN	0	1	1
CATHLAB	1	3	4

Huduma za kipimo cha CT Scan sasa zinapatikana katika Hospitali 27 kati ya Hospitalii 28 za rufaa za Mikoa nchini. Kwa mwaka 2023, jumla ya wagonjwa 15,386 walipatiwa huduma za kipimo cha CT Scan katika Hospitali za Rufaa za Mikoa ambapo huduma hizo zilikuwa hazitolewi katika hospitali za Rufaa za Mikoa hapo awali.



Picha ya MRI mashine ya kuchunguza magonjwa kama vile misuli, mishipa ya damu na fahamu, ubongo na vivimbe katika Hospitali ya Rufaa ya Kanda ya Nyanda za Juu Kusini - Mbeya.



Miongoni mwa vitanda vya wagonjwa mahututi ambavyo vilivyowekwa katika Hospitali ngazi ya Taifa, Maalum, Kanda na Mkoa.

Vitanda vya Kulaza Wagonjwa Vyaongezeka

Idadi ya vitanda vya wagonjwa katika vituo vya kutolea huduma za afya nchini imeongezeka kutoka vitanda 86,131 mwaka 2021 hadi vitanda 126,209 Machi 2024. Ongezeko la vitanda vya wagonjwa limesaidia kuongeza ubora na ufanisi wa huduma za afya hususani huduma za afya ya mama na mtoto.

Vilevile Serikali imekamilisha ujenzi wa wodi 45 za wagonjwa mahututi (ICU) katika hospitali ngazi ya Taifa, Maalum, Kanda na Mkoa na kuziwekea vifaa na vifaa tiba. Pia Serikali inaendelea na ujenzi wa ICU 28 katika ngazi ya Halmashauri ambapo 27 kati ya hizo zimekamilika na moja (1) iko hatua ya ukamilishaji. Hatua hii imeongeza idadi ya vitanda kwa ajili ya wagonjwa mahututi (ICU) katika vituo vya umma kutoka vitanda 258 vya mwaka 2021 hadi kufikia vitanda 1,362 mwaka 2023.



Vitanda vya wagonjwa vilivyopo katika Hospitali za Rufaa za Mikoa, Hospitali za Halmashauri/Wilaya na baadhi ya vituo vya kutolea huduma za afya nchini.



Wodi ya wagonjwa mahututi na wanaohitaji uangalizi maalum (ICU) wakiendelea kupatiwa huduma katika Taasisi ya Moyo ya Jakaya Kikwete JKCI.



MATOKEO:

Ongezeko la vitanda vya wagonjwa mahututi (ICU) katika Hospitali za umma linalenga kuboresha huduma na kupunguza vifo vinavyotokea ndani ya hospitali ambavyo vinaweza kuzuilika kati ya asilimia 20 hadi 30.




Magari ya kutoka MSD yakisafirisha bidhaa za Afya katika maeneo mbalimbali nchini.

Kuimarisha Upatikanaji wa Dawa na Bidhaa za Afya

Serikali ya awamu ya sita imeendelea kuimarisha hali ya upatikanaji wa dawa na bidhaa za afya ambapo, katika kipindi cha miaka mitatu, wastani wa Shilingi Bilioni 20 zimekuwa zikitolewa kila mwezi.

Upatikanaji wa fedha hizo umewezesha kuimarika kwa upatikanaji wa dawa muhimu na bidhaa nyingine za afya (aina 290) katika vituo vya kutolea huduma za afya vya umma kufikia asilimia 84 mwaka 2023 ikilinganishwa na asilimia 58 mwaka 2022.

Aidha, hali ya upatikanaji wa bidhaa za afya kwa ngazi za vituo vya kutolea huduma za afya hadi kufikia mwezi Desemba 2023 ni kama ifuatavyo;





Moja ya Gari la Usafirishaji kutoka MSD Kanda ya Mwanza likishusha bidhaa za Afya katika Hospitali ya Manyamanyama iliyoko Halmashauri ya Bunda mji Mkoani wa Mara.

UJUMBE:



Upatikanaji wa dawa, vifaa, vifaa tiba na vitendanishi umehakikisha kila mwananchi anapata mahitaji yote muhimu ya msingi ya kimatibabu pale anapoenda kupata huduma katika vituo vya kutolea huduma za afya.



Jengo la huduma ya afya ya mama na mtoto Meta Mkoani Mbeya.

Kuimarisha Huduma za Afya Uzazi, Mama na Mtoto

Katika kipindi cha mwaka 2021 hadi Machi 2024, Serikali ya Awamu ya Sita imeendelea kuwekeza katika huduma za afya ya Uzazi, Mama na Mtoto.

Uwekezaji huo umefanyika katika maeneo yafuatayo;

1. Kukamilisha ujenzi wa jengo la kutoa huduma za afya ya Mama na Mtoto Meta iliyopo katika Jiji la Mbeya ambayo tayari inatumika na imegharimu shilingi bilioni 13.2.
2. ii. Kuendelea na ujenzi wa majengo ya huduma za Mama na Mtoto (Maternity Blocks) kwenye Hospitali za Rufaa za Mikoa ambazo ni Sekou Toure (Mwanza), Geita, Simiyu, Mawenzi, Njombe na Songwe ambazo zimegharimu kiasi cha shilingi bilioni 71.1.



Jengo la huduma za afya ya mama na mtoto lililo katika Hospitali ya Sekou Toure Mwanza.



Wodi ya wazazi iliyopo katika kituo cha Afya Bulale Mkoani Mwanza.

3. Serikali ya Awamu ya 6 chini ya Rais Samia Suluhu Hassan imeimarisha huduma za Upasuaji wa Wajawazito kwa Kuongeza vituo vyenye uwezo wa kutoa huduma za upasuaji wa dharura wa kumtoa mtoto tumboni (CEMoNC) kutoka vituo 340 mwaka 2021 hadi kufikia vituo 523 mwaka 2023.
4. Kuanzisha wodi maalum kwa ajili ya huduma za watoto wachanga wagonjwa (Neonatal Care Units - NCU), ambapo hadi kufikia desemba 2023 jumla ya Hospitali 189 zinatoa huduma za NCU ikilinganishwa na Hospitali 165 mwaka 2022 na Hospitali 14 tu mwaka 2018.




Wodi maalum kwa ajili ya huduma za watoto wachanga wagonjwa (Neonatal Care Units - NCU) katika wilaya ya Maswa Mkoani Simiyu.



Vifaa vya NCU katika Hospitali ya Rufaa ya Mkoa wa Njombe.

5. Kuimarisha upatikanaji wa bidhaa za Afya ya Uzazi, Mama na Mtoto ambapo upatikanaji wake katika Vituo vinavyomilikiwa na Serikali umeongezeka kutoka asilimia 82.5 mwaka 2021 hadi asilimia 88.2 mwaka 2023.
6. Kuimarisha huduma za Saratani ya mlango wa kizazi, ambapo jumla ya mashine 140 (Thermalcoagulator) za uchunguzi wa Saratani zimenunuliwa na kusambazwa kwenye vituo 140 vya kutolea huduma za afya katika Halmashauri 104 katika Mikoja 26. Vifaa hivi vina thamani ya jumla ya shilingi Bilioni 1.1.



Waziri wa Afya Mhe. Umyy Mwalimu akiwa katika wodi maalum kwa ajili ya huduma za watoto wachanga wag-onjwa (Neonatal Care Units - NCU) iliyopo katika Hoapitali ya Rufaa Mount Meru Mkoani Arusha.

7. Mfumo wa M-mama - Serikali ya Awamu ya Sita imeanzisha mfumo wa kieletroniki wa M-mama unaorati-bu rufaa, kwa kusafirisha akina mama wajawazito na watoto wachanga wanaohitaji huduma za dharura kutoka ngazi ya jamii hadi kwenye vituo vya kutolea huduma za afya au kutoka kwenye kituo cha kutolea huduma cha ngazi ya chini kwenda kituo cha ngazi ya juu. Kwa kipindi cha mwaka 2022 hadi mwaka 2023 mfumo huu umendelea kufanya kazi katika Mikoa yote 31 Tanzania Bara na Zanzibar. Aidha, jumla ya wateja 46,941 wamenufaika na huduma za dharura za rufaa,

kati ya hao akina mama walikuwa 38,560 sawa asilimia 82, watoto wachanga walikuwa 8,273 sawa na asilimia 17 na mama pamoja na mtoto kwa pamoja walikuwa 108 sawa na asilimia moja (1).

Vilevile, wateja wote wa m-mama wana-hudumiwa na Watoa huduma waliopo kwenye vituo vyote vya kutolea huduma za afya vya Serikali nchini.


Mfumo huu umerahisisha utoaji wa huduma za dharura kwa wakati kwa kuwafikisha wateja katika vituo sahihi vya matibabu.



MATOKEO YA BAADHI YA VIASHIRIA HIVYO NI PAMOJA NA:

Ongezeko la Wajawazito waliojifungulia kwenye vituo vya kutolea huduma za afya

Idadi ya wajawazito wanaojifungulia katika vituo vya kutolea huduma za afya Nchini imeendelea kuongezeka kutoka asilimia 63 mwaka 2021 hadi asilimia 85 mwaka 2023. Lengo la nchi ni kufikia asilimia 95 ya wanaojifungulia kwenye vituo vya kutolea huduma za afya ifikapo mwaka 2030.



MATOKEO:

Kutokana na uwekezaji mkubwa uliofanywa na Rais Samia Suluhu Hassan katika kuimarisha ubora wa huduma za afya ya uzazi, mama na mtoto ambapo kupitia Viashiria vikuu vinavyotumika kupima mwenendo wa ubora wa huduma kwa Nchi Wanachama wa Shirika la Afya Duniani imejidhihirisha wazi kuwa Nchi yetu imefanya vizuri sana katika kuimarisha huduma za afya ya uzazi, mama na mtoto katika kipindi cha miaka mitatu (3).

Kuimarisha Upatikanaji wa Huduma za Ubingwa na Ubingwa Bobezi Nchini

6.1 Huduma za ubingwa na ubobezi zapatina nchini kwa gharama nafuu

Serikali ya Awamu ya Sita chini ya Uongozi mahirii wa Rais Dkt Samia Suluhu Hassan imeimarisha upatikanaji wa huduma za matibabu ya ubingwa na ubingwa bobezi (Specialized and Super Specialized) ikiwemo huduma za Upasuaji mgumu wa moyo bila kufungua kifua (Catheterization procedure), Upasuaji wa moyo kwa njia ya tundu dogo; upandikizaji Figo (Kidney Transplant), Upandikizaji Uloto (Bonne Marrow Transplant); Upandikizaji wa Vifaa vya Usikivu kwa watoto (Cochlea implants), kuweka puto tumboni na upasuaji mgumu wa mifupa na mishipa ya fahamu.

Katika kipindi cha miaka mitatu, Huduma za Ubingwa Bobezi zilizotolewa zilikuwa ni pamoja na:

- Upandikizaji vifaa vya usikivu kwa watoto ambapo jumla ya watoto 25 waliowekewa kati ya hao watoto 11 wamewekewa vifaa hivyo mwaka 2023/24.
- Upandikizaji wa figo ulifanyika kwa wagonjwa 27, kati yao wagonjwa 16 wamefanyiwa katika kipindi cha mwaka 2023/24
- Upandikizaji uloto wagonjwa 15 tangu ilipoanzishwa mwaka 2021.
- Upasuaji wa Moyo kwa njia ya Tundu dogo wagonjwa 5,954 kati yao wagonjwa 2,289 wamefanyiwa katika kipindi cha mwaka 2023/24,

- Kuweka Goti Bandia wagonjwa 662, kati yao wagonjwa 385 wamefanyiwa katika kipindi cha mwaka 2023/24,
- Kuweka puto tumboni wagonjwa 166 wamepata huduma hiyo tangu kuanzishwa kwake mwaka 2021.

Huduma hizi ziliolewa katika Taasisi ya Moyo ya Jakaya Kikwete (JKCI); Hospitali ya Taifa Muhimbili (MNH), Taasisi ya Mifupa (MOI); Taasisi ya Saratani ya Ocean Road, Hospitali ya Benjamin Mkapa Dodoma na Hospitali nyingine za Rufaa za Kanda na Mikoa.



Madaktari bingwa wa upasuaji wa moyo na mishipa ya damu wa JKCI wakimfanyia upasuaji wa kupandikiza mshipa wa damu mgonjwa ambaye mshipa wake ulikuwa umeziba ((Coronary Artery Bypass Graft Surgery – CABG).



Madaktari Bingwa wa Hospitali ya Taifa Muhimbili wakimfanyia upasuaji kwa njia ya matundu madogo mtoto ambaye alikua na tatizo la kumeza (Achalasia) tangu akiwa na miaka sita kutokana na mishipa yake ya fahamu ya koo la chakula kuharibika.



Madaktari bingwa wa MOI wakimfanyia upasuaji mkubwa mgonjwa katika maabara maalum ya upasuaji wa ubongo bila kufungua fuvu (Angio Suite).



MATOKEO:

Uwekezaji mkubwa uliofanywa na Rais Dkt Samia Suluhu Hassan katika kuimarisha huduma ubingwa na ubingwa bobebi umewezesha wananchi wengi kupata huduma hizi ndani ya nchi kwa gharama nafuu badala ya kuzitafuta nje ya nchi. Aidha uwekezaji huu umeweza kuvutia wagonjwa mbalimbali kutoka nje ya nchi na hivyo kuifanya nchi yetu kuwa Kituo cha Tiba Utalii kwa ukanda wa nchi za Afrika Mashariki na kusini mwa Afrika.



Daktari bingwa wa Upasuaji wa Ubongo, Mgongo na Mishipa ya fahamu Dkt. Aingaya Kaale akimhudumia mgonjwa katika kliniki ya Wagonjwa Maalum na wagonjwa wa kimataifa iliyopo MOI (Premier and International Patients Services).

6.2 Tiba Utalii nchini inakuwa, tunashuhudia ongezeko la Raia wa kigeni kuja Tanzania kwa ajili ya matibabu

Kutokana na uwekezaji mkubwa uliofanyika katika kuboresha huduma za kibingwa na bobezi, nchi yetu imeweza kuvutia wagonjwa mbalimbali kutoka nje ya nchi.

Kwa mwaka 2023, idadi ya wagonjwa kutoka nje ya nchi wa Tiba Utalii waliokuja kutibiwa nchini ilikuwa 6,931 ikilinganishwa na wagonjwa 3,957 mwaka 2022 na wagonjwa 75 mwaka 2021. Wagonjwa hawa wanatoka katika nchi za Comoro, Malawi, Burundi, Zambia, Congo DRC, Uganda, Zimbabwe na Kenya.

Wagonjwa hawa walihudumiwa katika Hospitali 6 ambazo ni Hospitali ya Taifa Muhimbili, Taasisi ya Saratani ya Ocean road, Taasisi ya Moyo ya Jakaya Kikwete, Taasisi ya Mifupa (MOI) na Hospitali binafsi za Aga Khan na Saifee

Serikali ya Rais Samia kupitia Wizara ya Afya imejipanga kuendelea kutoa huduma za ubingwa na ubingwa bobezi karibu zaidi na wananchi.

Kupitia Mafunzo elekezi kutoka kwa wataalam bingwa (Mentorship Program) kutasaidia kuleta chachu ya mabadiliko ya utoaji huduma za afya ili kuweza hudumia vyema wananchi katika kupata huduma bora za kibingwa.



Muonekano wa eneo maalum la kusubiria huduma kwa wateja mashuhuri na viongozi mbalimbali wa Serikali na mabalozi.



Jengo la Huduma za Dharura (EMD) katika Hospitali ya Rufaa ya Mkoa Maweni (Kigoma)

Kuimarisha Huduma za Dharura na Hali

7.1 Majengo wa Huduma za Dharura (EMD) yaongezeka

Serikali ya Awamu ya Sita imekamili-sha ujenzi wa majengo 23 ya kutoa huduma za dharura (EMD) katika hospitali Maalum, Kanda na Mikoa na kuziwekea vifaa na vifaa tiba. Aidha kwa upande wa ngazi ya msingi, ujenzi wa EMD 82 katika ngazi za Hal-mashauri unaendelea, ambapo EMD 66 zimekamilika na zinatoa huduma na nyingine 16 ziko kwenye hatua ya ukamilishaji. Miaka mitatu ya Rais Samia imewezesha kuanzishwa kwa majengo mahususi ya huduma za dharura na ajali (EMDs) 105 kutoka EMD 7 zilizokuwepo mwaka 2020.

Aidha, hadi sasa jumla ya wateja 262,260 wamenufaika na huduma za dharura nchini. Kukamilika kwa ujenzi wa EMD kutapunguza vifo na kuokoa maisha kwa wagonjwa wa dharura na wa ajali kwa asilimia kati ya 40-50 kwa mujibu wa tafiti za kitaalam

Miaka mitatu ya Rais Samia imewezesha kuanzishwa kwa majengo mahususi ya huduma za dharura na ajali (EMDs) 105 kutoka EMD 7 zilizokuwepo mwaka 2020.



Jengo la idara ya magonjwa ya dharura (EMD) lililopo katika Hospitali ya Halmashauri ya Wilaya ya Handeni.



Jengo la idara ya magonjwa ya dharura (EMD) lililopo katika Hospitali ya Rufaa ya mkoa wa Lindi.



MATOKEO:

Kukamilika kwa ujenzi wa EMD kumeongeza idadi ya Hospitali za Rufaa za Mikoa, maalumu, na kanda zinazotoa huduma hiyo kutoka 7 mwaka 2020 na kufikia 116 Desemba 2023. Yote haya yamepatikana ndani ya miaka mitatu ya Uongozi wa Rais Dkt. Samia Suluhu Hassan. Matokeo ya uwezekaji huu kutapunguza vifo ndani ya hospitali kwa asilimia 40 na kuokoa maisha ya wananchi wanaohitaji huduma za dharura na ajali.



Dkt. Samia Suluhu Hassan Rais wa Jamhuri ya Muungano wa Tanzania akikabidhi magari ya kubebea wagonjwa 'Ambulance' 216 kwa ajili ya kurahisisha utoaji wa huduma za matibabu ya dharura kwa wagonjwa.

7.2 Magari ya kubebea wagonjwa yanunuliwa na kusambazwa kila kona

Pia, Serikali imenunua jumla ya magari ya kubebea wagonjwa 727 ambapo hadi sasa jumla ya 327 yamepokelewa na kusambazwa katika vituo vya kutolea huduma za afya nchini.

Ambulance hizi zinakwenda kusaidia kusa-firisha wagonjwa wakiwemo akinamama wenye changamoto za uzazi kwa haraka na kuwafikisha katika huduma za rufaa na hivyo kupunguza adha kwa wananchi na kupunguza vifo vinavyoweza kuzuilika.



Dkt. Samia Suluhu Hassan Rais wa Jamhuri ya Muungano wa Tanzania akikabidhi magari ya kubebea wagonjwa 'Ambulance' 216 kwa ajili ya kurahisisha utoaji wa huduma za matibabu ya dharura kwa wagonjwa.

Rasilimali Watu Katika Sekta ya Afya

Serikali ya Awamu ya sita imeendelea kufanya uwekezaji katika eneo la rasilimali watu katika afya ikiwemo kuajiri watumishi wapya wa Sekta ya Afya na kusomesha wataalamu wa afya katika fani mbalimbali za ubingwa na ubobezi.

- **Kuongeza idadi ya watumishi wa afya**

Serikali imeendelea kuajiri wataalam katika Sekta ya Afya ambapo jumla ya wataalam 35,450 wa kada mbalimbali wameajiriwa na kusambazwa katika vituo vya kutolea huduma za afya nchini katika kipindi cha kuanzia mwaka 2021 hadi 2023. Aidha, jumla ya ajira za mikataba kwa watumishi wa Afya 2,836 kupitia miradi mbalimbali ya Serikali zilitolewa.

- **Ongezeko la Madaktari bingwa na bobezi**

Jumla ya madaktari bingwa nchini hadi kufikia mwaka 2023 wamefikia 2,464 ukilinganisha na madaktari Bingwa 805 mwaka 2020.

- **Uendelezaji wa Rasilimali Watu katika Afya**

Serikali ya Awamu ya Sita imeendelea kuimarisha upatikanaji wa wataalam wabobezi kwa ajili ya utoaji wa huduma za Kibingwa na Ubingwa Bobezi, kwa kuanzisha Dkt Samia Super Specilized Scholarships ambapo hadi sasa, jumla ya wataalam 1,211 wamepata mafunzo mbalimbali ya kibingwa na bobezi na hivyo kuongeza idadi ya wataalam wa mafunzo ya kibingwa na bobezi kutoka 535 mwaka 2021 hadi 1,211 hadi kufikia sasa. Aidha, kiasi cha shilingi bilioni 22 kimetumika kugharamia mafunzo haya.

Jumla ya Wataalam mwaka 2024

1,211

wamepata mafunzo mbalimbali ya kibingwa na bobezi na hivyo kuongeza idadi ya wataalam wa mafunzo ya kibingwa na bobezi kutoka 535 mwaka 2021.



MATOKEO:

Jitihada hizi zitasaidia kupata wataalam wa afya kwenye fani za kibingwa na bobezi watakaotumika kujenga uwezo wa wataalam wetu wa afya katika vyuo vya mafunzo ya afya nchini. Vilevile jitihada hizo zitaimarisha upatikanaji wa huduma hizo za kibingwa bobezi ambazo zitawezesha nchi kunufaika na tiba utalii. Hadi sasa Taasisi zetu zimeweza kutoa tiba utalii kutoka nchi za **Comoro, Burundi, Malawi, Kenya, Congo DRC, Uganda na Zambia.**

Mapambano Dhidi ya Virusi vya Ukimwi, Malaria na Kifua Kikuu



VIRUSI VYA UKIMWI:

Kwa upande wa ugonjwa wa UKIMWI, Serikali imeendelea kudhibiti maambukizi ya ugonjwa wa UKIMWI ambapo katika mwaka 2023 jumla ya watu 8,145,576 walipima Virusi vya UKIMWI (VVU) kulinganisha na watu 6,930,758 mwaka 2022 na watu 6,493,583 mwaka 2021 (Taarifa kutoka Mfumo wa DHIS2 2023).

Kati ya watu waliopima mwaka 2023, watu 163,131 walingundulika kuwa na maambukizi ya VVU ukilinganisha na watu 182,095 mwaka 2022 na watu 198,042 mwaka 2021 (DHIS2 2023). Waliokuwa wanatumia dawa za kufubaza virusi vya VVU walikuwa 1,663,651 Desemba 2023 kulinganisha na watu 1,612,512 Desemba 2022 na watu 1,520,589 mwaka 2021. Mwaka 2023, Vifo vitokanavyo na UKIMWI vilikuwa 22,000 kulinganisha na vifo 29,000 mwaka 2022 na vifo 25,000 mwaka 2021 (Spectrum 2022).

Katika kuhakikisha kuwa huduma kwa WAVIU zinasogezwa karibu zaidi na jamii, Wizara ya Afya kwa kushirikiana na Wadau mbalimbali wa maendeleo imekuwa ikifanya jitihada za makusudi kabisa za kuhakikisha kila kituo cha afya nchini kinakuwa na uwezo wa kutoa huduma kwa waathirika wa UKIMWI.

Hadi kufikia Mwezi Desemba 2023, Idadi ya vituo vinavyotoa huduma ya Tiba na Matunzo vimefikia vituo 7,396 kutoka vituo 7,072 mwaka 2021 na kati ya hivyo CTC kamili ni 3,572 na vituo vya huduma ya mama na

mtoto (RCHS) vinavyotoa huduma ya kutoa dawa ya kufubaza Virusi vya UKIMWI vipo 3,824.



MALARIA:

Kwa upande wa ugonjwa wa MALARIA, Serikali imeendelea kudhibiti maambukizi ya Ugonjwa wa Malaria ambapo katika mwaka 2023 jumla ya watu milioni 19.8 walipima ugonjwa wa Malaria kati yao watu milioni 3.46 walikutwa na Malaria kulinganisha na watu milioni 18.6 walipima mwaka 2022 na kati yao milioni 3.52 walikutwa na ugonjwa na watu Milioni 20,241,982, waliopimwa mwaka 2021 na kati yao Milioni 4,443,946 walikutwa na maambukizi.

Vifo vitokanavyo na Malaria vilikuwa 1,540 mwaka 2023 ukilinganisha na vifo 1,735 mwaka 2022 na vifo 1,882 mwaka 2021.



KIFUA KIKUU:

Kwa upande wa ugonjwa wa kifua kikuu, Serikali iliendelea kudhibiti maambukizi ya ugonjwa huu ambapo katika mwaka 2023 jumla ya watu 440,988 walipima ugonjwa wa TB kulinganisha na watu 398,676 mwaka 2022 na watu 354,324 mwaka 2021. Walio-gundulika kuwa na TB mwaka 2023 ni 90,585 kulinganisha na watu 100,984 mwaka 2022 na watu 60,068 mwaka 2021.

Mwaka 2023, Vifo vitokanavyo na TB vilikuwa 18,100 kulinganisha na vifo 25,800 mwaka 2022 na vifo 26,800 mwaka 2021.

Udhibiti wa Magonjwa ya Mlipuko kwa Muda Mfupi

Mwaka 2023, visa vya viwili vya ugonjwa wa Marburg vilipatikana, ambapo Serikali iliweza kudhibiti kabisa kusambaa kwa ugonjwa hatari wa **Marburg** kwa kupitia uwekezaji wa miundombinu ya maabara ya kisasa Mkoani Kagera, nchi yetu iliweza kupambana na janga la Marburg kwa kugundua mapema na kuudhibiti ndani ya siku 69 hii ikiwa ni historia ukilinganisha na nchi za jirani kama Uganda iliyo-tumia siku 113 na Equatorial Guinea siku 122.

Ndani ya Siku



69

Nchi yetu iliweza kupambana na janga la Marburg kwa kugundua mapema na kuudhibiti.

Sheria ya Bima ya Afya kwa Wote Yapitishwa Bungeni

Serikali ya Awamu ya Sita imefanikisha kutungwa kwa Sheria ya Bima ya Afya kwa Wote Na. 13 ya mwaka 2023 ambapo tarehe 19 Novemba, 2023 iliwekwa saina na Mheshimiwa Dkt. Samia Suluhu Hassan, Rais wa Jamhuri ya Muungano wa Tanzania.

Malengo makuu ya Sheria ya bima ya afya kwa wote ni kuwawezesha wananchi wote kuwa na uhakika wa kupata huduma za afya wakati wote bila kikwazo cha fedha hususan kwa kaya masikini.

Aidha, mafanikio ya kutungwa kwa Sheria hiyo pia ni kuanzishwa kwa mfuko wa kugharamia bima ya afya kwa kuwa na vyanzo mahususi vya fedha.

Vilevile kutekelezwa kwa Sheria hiyo kutawezesha vituo vya kutolea huduma za afya kuwa na mapato ya uhakika na hivyo kuboresha huduma za afya zito-lewazo kwa wananchi.



MWELEKEO WA SEKTA YA AFYA 2024

Wizara ipo katika mapitio ya Sera ya Afya ya mwaka 2007 ili kuimarisha utoaji wa huduma za afya. Sera inayoandaliwa ina dira ya kuwa na jamii yenye afya bora na ustawi inayochangia kikamilifu katika maendeleo binafsi na ya nchi.

Aidha, Sera hiyo inatarajiwa kuimarisha huduma za kibingwa na ubingwa bobenzi ili kupunguza rufaa za wagonjwa nje ya nchi na kuvutia wagonjwa kutoka nje ya nchi (Medical Tourism).

Vilevile, Sera inalenga kuimarisha mifumo ya ugharamiaji wa huduma za afya na kuhakikisha kila mwananchi anakuwa katika mfumo wa bima ya afya na kuendelea kuimarisha huduma za Kinga na Tiba za kukabiliana na magonjwa ya kuambukiza na yasiyoambukiza pamoja na huduma za uzazi, mama na mtoto.

Kwa kuzingatia Dira ya Taifa ya Maendeleo, Mpango Mkakati wa Sekta ya Afya, na Ilani ya Uchaguzi ya CCM, Serikali ya Awamu ya 6 itaendelea kufanya uwekezaji mkubwa kwenye Sekta ya Afya kwa lengo la kuimarisha ubora wa huduma ili kufikia lengo la Afya kwa wote. Mwelekeo mkubwa utakuwa ni kuimarisha UBORA WA HUDUMA NA SIO BORA HUDUMA.







Miaka mitatu ya Uongozi wa **Dkt Samai Suluhu Hassan**, sekta ya afya inasonga mbele. Namba zinaongea. Tunamshukuru Raisi kwa maono yake na kwa kutuwezesha kutekeleza mikakati mbalimbali ya kuboresha huduma za afya. Aidha tunawashukuru na kuwapongeza watumishi wa afya wa kazi zote kwa kuhudumia wananchi.

Vilevile tunawashukuru wananchi kwa ushirikiano wao mzuri katika kuimarisha utoaji wa huduma za afya nchini. Tunatoa wito kwao kuchukua hatua ili kujikinga na kudhibiti magonjwa ya kuambikiza na yasiyo ya kuambukiza. Wizara itaendelea kuchukua hatua mahususi ili kutatua changamoto zilizopo na zitakazojitokeza katika utoaji wa huduma za afya.



Mji wa Serikali - Mtumba,
Barabara ya Afya,
S.L.P 743
40478, DODOMA

   wizara_afyatz
 Wizara ya Afya Tanzania

